

道光八年五月廿日

奏



奏為恭報科考完竣循例錄遺仰祈

聖鑒事臣於上年夏間歲考已周即舉行科考業將

考過情形

奏明在案隨於秋間出棚以次按臨至今年五月中計科試九府四州均已歲事當即旋省伏查粵東風會日開人知嚮學近年科名較盛士氣更覺奮興臣以致用之方本乎經術博聞之益資乎詞章是以考校生童必以經解覘其根柢以詩賦驗其性情華實兼收使歸醇雅惟瓊州所屬各州縣僻處海外學舍荒蕪

文廟多有傾圮者臣每捐廉倡修並飭地方官廣

設義學招集生徒比來瀕海之區文風頗蒸蒸
日上其各學月課臣俱親加甄核隨時批示與
之剖析義利之辨指陳奢儉之原俾各爭自濯
磨士習尚均安靜本年舉行正科鄉試現在將
屆錄遺臣竊惟掄才備用所貴文行交修苟行
止不謹即文藝可觀亦必覈實扣除概不錄送
至於臨時校閱臣自當潔己秉公準額定數固
不敢過嚴而近刻亦不敢濫取以沽名其夤緣
請託之風臣已儆戒周防早為杜絕庶幾士子
進身之始趨嚮克端以期仰副

聖主興賢育才之至意所有科考事竣及接辦錄遺
情形理合繕摺具

奏伏祈

皇上

聖鑒謹

奏

知道

道光八年五月

二十一

日

